

四庫全書

集部

欽定四庫全書

集部

玉筍集卷八至十

詳校官監察御史臣劉湄

中書臣劉源溥覆勘

覆校官中書臣方大川

校對官中書臣潘奕雋

謄錄監生臣湯汝梅

欽定四庫全書

玉筍集卷八

元 張憲 撰

近體 五言

瑞柳十二韻

綠霧靄華滋柔條着地垂玲瓏隔翠幙婀娜拂長絲種
近臨春閣分來太液池彩堂依密蔭珍幹夾宏基九烈
朝衣貴三眠晝漏遲汗溝全盛日張緒少年時裊裊含
芳色茸茸發令姿葳鴉春尚淺拂燕舞頻歌沐雨披雲

髻鬢烟斂黛眉妬深渾是恨嬌重半如癡莫訝多纖麗
何曾識別離更培連理樹相對映門楣

投贈周元帥十韻

玉帳臨江近金城鎮海遙鼓聲秋動地劍氣夜冲霄露
下星河白風高草木凋山寒旗獵獵沙靜馬蕭蕭左廣
初傳駕西船已畏燒五離繞散鼠六博又成梟豪傑乘
時奮賢材早見招紫樞虛上座黃闥待清朝會見擒奸
操歸來醉小喬恩波門外柳長拂富春潮

壽星將軍十六韻

大將開軍府明旌擁節旄威聲千里震雄略萬人豪虎
運乘時奮龍星並日高誓將擒趙歇義不事朱滔古法
傳三陣新書變六韜花門重製鎧大食舊遺刀畫戟終
依陞彤弓豈在鞞銀章分斗印珠鞍上花袍會客春開
宴傳觴夜伐磬壽筵王母降醴酒穆生逃脰胸薰地角
燕支浴鳳毛白麝銜瑞草青鳥送蟠桃豪飲醕三日雄
牽餼百牢杯深紅瑪瑙酒溢紫蒲萄未祝南山頌先煩

北府勞雲臺多彩繪好去逐英髦

林塘幽十四韻

勝境愜幽尋芳塘簇茂林漫天驚滉漾拔地見蕭森隔
水時聞磬穿花或聽琴青浮鰲弁小黑直蜃宮深躍藻
跳珍鯉爭枝墜野禽風回微作籟雲去尚留陰鶴起如
迎客龍歸若獻琛蘿房依蔭比寶棧渡迷沉春雨移舟
坐秋霜倚杖吟登惟便枕簟莫欲棄冠簪住久將忘世
觀來已悟心埃塵猶不到榮辱詎能侵天貢朝朝下神

燈夜夜臨閨浮那有此大士現潮音

贈道士十韻

紅絲牽斗杓白刃斬霓腰雲雨多消散天星盡動搖指
推狐女仆目爍蜃郎焦冠碾含腴玉衣栽豐雪綃青騾
晨渡海赤鯉夜迎潮弱水纔容葦蓬萊不用橋暫離金
母宴又赴木公招石鼎閒聯句瓊樓臥品簫祕書傳寶
籙名籍掛神霄下士年華促丹爐許借燒

寄何九處士十韻

聞道遷新業，濮家原上居。
連床棄珍玩，囊載未詩書。
臘水春前釀，晴泥雨後蔬。
琴清花院靜，碁響竹窻虛。
紀歷忘秦漢，徵租絕吏胥。
浮鷗孤艇棹，健犢短轅車。
綠樹行吟罷，黃庭坐對餘。
山林奚必問，鐘鼎待何如。
情已羲皇上，時方雜霸初。
觸蠻兩蝸角，天地一蘆廬。

宿瓜州渡

夜泊瓜州渡，天空客思清。
月生滄海白，潮落大江傾。
目短中流楫，心摧去國旌。
着鞭吾豈敢，王室正承平。

懷完者禿元帥

勇略經千載威聲落萬夫
虎紋橫赤頰犀骨貫霜顱
海盜清旗幟倭人讐畫圖
鯨鯢今縱恣風浪滿江湖

秋日古城

國勢方龍鬪林居且鶴栖
鼓風秋樹急接日暮雲齊
江淺沙吞地山迴石礙溪
日將兵火信融化作詩題

寄大香師

圓帽頂紅毳方袍搭絳紗
海龍邀早飯山鹿進秋花
試

墨探倭紙尋泉鬪建茶時拋紅豆粒竹下喚頻伽

戲贈陳李二萬戶各一首

金虎橫腰重銀盔壓頸酸力能擒項藉氣欲矮曹瞞雅
有長城寄貧無故紙鑽憑誰奏天子易爾惠文冠
聞道尊君父功成丈八鎗金牌晴射日白馬夜飛霜羊
肉分軍士人皮貼戰瘡箕裘如可紹不用試三場

贈西僧

西離五印度東渡獨繩橋海若擎雙足天花上七條胡

經函貝葉飯鉢繫椰瓢回首流沙路程達十萬遙

菊隱

隱士追陶令黃花托素心或從隣舍飲不厭貴人尋曉
露三花長秋風五柳深未須天子詔且盡酒家金

挽宣元杰

諱

圖沁特穆爾

天下政多故而公廼殞身縱非補天手猶勝望風臣日
月光雖薄乾坤氣尚新瘦軀如未死撥亂屬何人

挽陳衡之

諱

感舊詩千首傷情酒一樽
烟塵嗟白晝花月怨黃昏
瘦馬湖西路輕輿江上邨
玉樓雖帝命題着也銷魂

挽徐文卿

諱煥章

七尺虎熊體所傷髭髮稀
本鍾英氣出竟抱病魂歸土
壘思排陣風鏃記笑圍空
攜挂墳劍無處發長噫

挽李煥章

諱文

飛翼樓前路若即溪上山
雲居期共隱雪艇竟空還
邱嫂貧何業孤兒長更頑
一泓桑瀆水仍遶舊柴關

挽張子堅

諱風

文僅典州郡武徒經亂離異書肥白蠹雄劍吼蒼螭身
冷家人散門荒過客悲忠魂倘為厲猶可捍城危

挽張則正

諱木號小客星又號小桐君
有觀海集誅魃文行於世

雲外客星落江頭桐樹凋有文誅早魃無祿佐清朝觀
海聲名大回天志慮銷孀妻與孤子仍舊尾蕭蕭

挽孫元之

諱明

不躡西湖路秋風幾嘆嗟傷心倚廬樹過眼合歡花別

業飛龍劍離弦冷鳳琶至今資聖寺猶種故侯瓜

挽馮君祥

諱天
瑞

髻鬣為昆季烟塵更別離艱難惟爾共忠勇果誰知白
馬金戈冷紅鸞玉鏡悲燕山萬里外若箇送靈輶

挽楊原中

諱
原

習熟夾鎗法軍中作武師鑑年畫攬陣蹀躞夜交綏敢
戰惟聞鼓先登每望麾可憐包馬革無處認僵屍

挽程以謙

諱
式

草冷駱駝墩青燈斂恁魂皇輿春蕩蕩天策夜焯焯望
秦須從否扶乾在抑坤英雄今不語斯意與誰論

挽趙有道

諱信

學就過人藝不成昭代功寥寥千古道寂寂萬夫雄已
矣龜蛇廟哀哉虎豹叢余山西下日無樹起悲風

挽張思賢

號希賢

玉局頻鑿戰皇墳屢辨疑似君埋亦少如我活何為海
眼填星石天喉折斗司英雄都老去誰為補明時

燈下有懷

憶昔童娵店高屯坐夕曛樹聲呼出月石角碍回雲野
雉穿花見清猿隔澗聞馬頭三四子曾縛故將軍

寄贈延慶講臻雲谷

童子扣金鐘洞天嘶玉龍天王空裏見羅漢定中逢律
已兼儒行悲聲徹教宗有時吟未穩哦遍夕陽松

聽彈琴

吳生抱綠綺為我操春江洄湫收沙嶼飛濤濺石砭岸

低風挨柁船靜月窺窻萬派朝宗意鍾期信少雙

送孫伯明教授

白髮桃源長新恩教越州丰儀高勝畫情思淡於秋春
雨羲之屋涼風賀監舟遙知足登眺日與綉衣遊

答問湖源風土

湖源源上路東與浦陽連地勝藏春塢民居小有天秋
山紅入畫晴野白浮烟一道桃花水如今泊戰船

送海藏主之浙東

浙東多勝地師往幾時還夜雨天童寺春風雁宕山鳥
聲花外靜江影渡頭閒去去且隨分無勞雙鬢斑

送范士謙別

勝友早英發懷才人未知聰明管輅易局面賈玄棋霜
月鷄聲早江帆雁影遲相逢遽相別別後愈相思

簡蔣克政

四海皆龍戰潛夫尚讀書經營宜此始出處定何如樺
棹雙枝戟偏廂八陣車欲煩徵聘使因便寄吾廬

次韻海石上人書事

二首

張飛生冀北關羽出河東勇氣迅雷黑忠肝畏日紅腰
橫小青劍臂掛大黃弓才力萬人敵惜今無二公

旦視北斗北夜觀東井東截天沄氣白射月大星紅心
有一寸鐵力微兩石弓世乏段太尉夢懷郭令公

次韻僧文憲書事

二首

分省銀章重開邊鐵騎多南徭心似獸西馬項如駝夜
枕眠紅玉春衣繡綠羅營盤方十里不用大風歌

朱粲糟人少黃巢磨骨多
固陵宵遁馬沙苑戰回駝
白羽裝鞭箭紅銅鑄巨羅
兒童齊拍手攔路唱苗歌

聞說

聞說江城破歸心夢裡驚
肺肝從此熱手足近來輕
春事愁花朵晨齋怯鼓聲
平生慕王猛今日莫談兵

戎馬

戎馬復四起吾民何得蘇
江山雖王氣花柳且皇都
竟日黃塵暗連年白骨枯
王官皆重祿大廈許誰扶

寄曾彥魯

大尹久不起吾民何所任挑燈註脉訣閉閣讀官箴舉
世誰知己逢人即吐心不如憑玉局長日萬機沉

寄曾文湜

老淚多情思深吟苦寄誰喝盧驚彥道臨帖別羲之小
席金盤露長圍玉局棋醉眠忘戰伐何物斂頭兒

烏龜嶺草菴

戶納乾坤小山環日月遲瑞雲飛白鶴靈石墮玄龜魔

女能銷睡祖公不濟飢道人貪入定忘却下山時

寄宣元杰王元諒

昔者蘆溝月曾停十九車水聲深入地霜氣倒飛花路
險羸牛乏泥堅瘦馬癘槁錢餘不得拔劍野人家

悼博羅同知沒於軍

已矣專科學於今定若何陣雲寒可掬兵氣耿相磨鹿
脯祀天乙地神泣太阿哀哀霹靂棗偏向死門多

挽盧處士

月掩少微星
幽人奪壽齡
宋清良可傳
郭泰不慚銘
斷壟荒烟白
新阡野樹青
猶賢玉川叟
有子抱遺經

簡景初

千里淮吳府
先登得壯侯
馬蹄開鳥陣
虎氣繞蛇矛
春酒花攢帽
秋箏月滿樓
幕賓雖老病
曾識舊風流

簡王維賢王彥洪

聞道元戎府
風流得二王
紫毫金錯字
白馬水平槍
雁過蘆洲月
鴉啼楓樹霜
邊情宜少壯
遽肯老頻陽

次韻許萬戶三首

為問天台許誰能洗太陽旄頭雖弄角屍氣故生光山
市千峯暗江城百雉長獨憐官省樹無事起悲涼

伯圖紛雜亂玄象自昭回茅屋幾風雨孤城又草萊壯
心驚客雁病眼亂寒梅到處逢旌節誰為命世才

文墨老竒士弓旌得偉人尚功惟殺敵祕計肯和親玉
帳三邊夢金符百戰身猶懷蜀丞相羽扇白綸巾

取青樓夜飲戲葉子肅

酒令傳觴急燈花嚙燭低山人清似水老子醉如泥天
黑月墮地水寒星在溪猶吹赤蹄紙照道畫樓西

江道翁挽詞三章

自號冬木

相鶴浮邱伯騎騾石曼卿看花歸洞府採藥返蓬瀛劍
影埋金氣丹光隱木精滿空飛羽葆萬里海天清

天上碧桃熟山中丹藥成茅山朝跨虎弱水夜騎鯨華
蓋新分座芙蓉舊領城玉棺傳帝命飛去覺身輕

劫火然冬木先生去就輕法言遺許遜大藥授茅盈龍

虎低金兆烟霞護玉京
惟餘孫與子傳得步虛聲

簡陳照摩

尚憶錢王國車中舊往還
肩輿小西市立馬大官山
錦水明秋日金戈報曉關
空漫乞米帖無處破天擘

劉廷璋齋居

穀障秋烟薄花軒午漏長
傳衣裁白苧頰弁刃黃楊
散帙迎風亂清樽過雨涼
悠然北窻夢情思到羲皇

喜見樓次韻

高樓名喜見遠客獨傷今
鞍馬思劉備衣冠惜華歆
曙光浮海闊秋色到江深
送目闌干久冥鴻入窅沉

贈吳熙

吳子勇為義壯懷金石交
燈前看劍室花下弭弓稍
春雲鳥破夢曉烟麈在
庖不知攘臂者何事逐黃巢

代悼亡

漢武黃金屋何曾貯阿嬌
離鸞春對鏡孤鳳夜聞蕭
事往成陳迹情多賦小招
分香并賣履此意已蕭蕭

悼瑞上人死於兵

執手言猶在回頭事已非寧知三尺劍斷送六銖衣緣
淺金剛壞魔深舍利飛白雲堂上月還照怨魂歸

悼義閣黎死於兵

幻劍擊空屍痛深何足悲誰知祝髮日便是斷頭時綠
樹懷芳趾紅樓惱夢思最哀黃髮嫗不葬寧馨兒

送哲古心往吳江報恩寺

蘭若壓江橋長廊晝寂寥鳥啼春後樹龍起定中潮花

雨隨風散茶烟隔竹消客程他日路清話借通宵

題畫

雲寺隱難辨烟江遠莫窮水枯沙出石葉落樹呼風野
渡秋逾靜漁舟晚尚空尺綃意無限詎讓米南宮

寄周履道

清事何方好荆南溪上山雅懷凌鮑謝好手到張闕花
鳥春風碎雲松白晝閒可憐無與共獨岸小青還

寄蔡漢臣

十四從戎陣先鋒百戰輕休官推李敢敵馬避秦瑛伐
鼓春開宴銜枚夜突營何年靖淮梗封錦壽春城

留題陳惟允齋居

風雨茅齋夜琴樽清晝時雄談雖邂逅遽別愈相思落
日鳴孤馬平原卓大旗知君頗豪俊勿後戟門期

分題得吳王井送張常德

巧匠鑿山骨重泉出洞天聲虛響屨步影照捧心妍露
冷銀床滑秋空玉鏡圓養民功用在莫問邑頻遷

九日寄許廷佐張景昭

冷落黃花節蕭條白雁天
雄搏鵬九萬鏖戰馬三千
鐘鼎淹衰髮山河憶盛年
擬呼劉越石同著祖生鞭

次韻許萬戶

虎將有吟癖詩成命僕騷
倚床晨擊劍隔屋夜呼醪
落日銅駝冷秋江石陣高
欲持長脰梨涉海寄敖曹

九月十日同許廷佐吳近仁泛舟淞江

汎汎江湖濶蕭蕭廬舍稀
晚雲低遠樹秋水淡晴暉
大

野頻鏖戰孤城未解圍何當驅鐵馬北向靖王畿

不醉

不醉揚雄宅甘居許汜床求田空敗意識字謾成章射
虎衣裾短屠龍劍鼻長憂貧何日了筋力豈能強

感古

關內收三傑淮南養八公金成幽血碧龍起瑞雲紅過
眼王章碎回頭帝業空惟餘白楊樹一類響悲風

聽琵琶

引手作琵琶槽深羅紗花茶船方到岸鹽客未回家密
語恩何切相尤怨更諱江聲八千里心緒滿天涯

有懷亡弟

白塔寺前路朔風吹軟沙疊騎黃忽刺側抱紫琵琶乾
酪曉衝酒真酥夜打茶朱容竟何在兩泪濕黃麻

虎邱寺

四野天垂幔孤峯地湧金潮來講臺潤日午劍池深曲
徑穿紅樹長廊蔽綠陰小吳軒子好誰繼老坡吟

顧野王讀書堆

昔聞野王宅今上讀書堆
篁竹最深處菊花時自開
天風響鐘磬海氣結樓臺
回首陳梁事悲歌付一杯

大都即事六首

平章橋上日光祿寺前
春楊柳綠垂地桃花紅照人
粉香迷醉袖草色妬行輪
屠狗悲歌者空埋泉下塵

三月西山道春風平則門
繡鞍紅叱撥氈帽黑崑崙
衣襟分香裏壺餅借火温
醉歸楊柳月綠霧掩黃昏

小海春如畫斜家曉膏花連錢遊子騎斑竹美人家襖
色搖紅段擊香鬪蠟茶額黃斜入髻側髻半翻鴉

楊柳暮鴉啼鐘樓日又西小車隨客散歸馬望塵嘶碧
瓦差宮樹金波溢御堤時平足行樂誰問醉如泥

紅雪點綿袍青樓酒價高朱絲紅羅紗玉斗紫葡萄春
餽行綾卷秋醃割佩刀簾鉤風不定觸損鷓鴣毛

千步廊前月朦朧照御街風檐鳴寶鐸雷板耀金牌城
影平鋪地樓陰半上堦誰家吹短調一夜亂春懷

東戚少府

浙水險天下驚濤晝夜奔雲雷號海獸風雨走江豚少
府公田薄洪儒德望尊聖朝容讜議不用老吳門

聽雪齋

萬籟入沉冥坐深窻戶明微於疎竹上時作碎瓊聲撲
紙春虫亂爬沙夜蟹行袁安政無寐欹枕漏三更

柬張彥禎知事

臺憲故人老山林幽趣深放船歌落日倚杖聽秋霖架

有生風簡囊無負獄金獨賢顧同守不負好儒心

聞鄭國寶修無錫

足馬拒毘陵重圍百雉城金湯從地湧壁壘巨天橫風
勁彫弓急霜寒畫角清將軍正閒暇高枕亞夫營

寄馬將軍

馬服古名將孤軍鎮海壖射鵬天雨血拔犁地飛泉第
手調銀甲花奴遞玉鞭虎營燈火下自註十三篇

贈黃元帥

蕩盡百金產圖成一代名誓天關羽廟劃地呂蒙營峴
首嗟難鑿江流竟莫清滿懷忠義氣揮作淚縱橫

贈王良佐

雲起碧螺峰賢人出處同絕憐懷道德無處逐英雄使
者徵王斗諸侯重蓋公也知囊底智猶足掃江東

寄中山隱講師

問訊山中隱中山第幾重風廊巡夜虎雲鉢聽經龍流
水千溪月寒岩一樹松無因淨查滓來共上堂鐘

送宋仲溫還姑胥

興盡抱琴歸江空歲暮時孤城天拍水長路雪漫跂日
月催年事關河啓夢思冒箴幾兵甲能壓布帆遲

寄馬都事

職分歸南省軍機重左司欲成錢氏志無出馬家眉大
府晨趨早嘉猷夜退遲歸來椿館下猶作老萊嬉

柬孫大雅

別後東家子扃門只著書但令儲有粟豈問出無車精

緻追天祿工夫到石渠賓筵干櫓外須爾講關雎

東成元章

共說成夫子詩名逼有唐精神輞川畫風致午橋莊野
店鷄前月官河鴉後霜雪髯渾未撚七步已成章

贈顏欽若

六合故人散八方多艱深青年憂國淚白髮奉親心兩
履春苔妒寒氈夜雪侵尤憐乞米帖日向水窻臨

懷趙有道

武功原上路憶爾奮幽尋技巧神機秘經營霸業深幾年搔短髮何日遂初心病起寒江暮囊空買藥金

柬顧明府

水國差徭重江城廬舍稀曉星懸印出春雨勸農歸官馬哦新月公庭散夕暉欲知通守瘦但視野人肥

寄鍾伯紀

著就春秋傳緘封懶示人共傳懷伯略獨許作王臣葛亮終存漢揚雄謾劇秦憑君贍材力天下政風塵

寄題錢孟安書房

曲徑蹶平坡危橋跨斷河樹聲偷日短閣小借春多酒
熟妨詩債茶香却睡魔醉心經史內何用說登科

岳飛墓祠

半蓋樹陰團長廊列從官銀鎗火光現鐵鍊雪花寒二
帝孤魂散三軍老泪乾獨全秦檜首不挂藁街竿

過杭州雷院留題

急澗水沄沄長松蔽夕曛金鉞飛使者肉翅下天君寶

殿開鐘簾瑤絨冷語文晚來龍取水湖面滾雷雲

題樂靜草堂

古稱仁者靜所樂在居山一鳥不敢語萬松相對閒小
齋迂逕入深戶襍花間擾擾喧詠子何曾見一班

柬邵可大

四裔政瓜潰羣雄分蝟張橫磨狂景劍勇恃老儋鎗瘡
雨銷銅柱天災火栢梁誰為股肱郡往取後降王

贈張習之

膏雨盡廉纖
爐烟不隔簾
燕泥侵玉塵
蛛網挂牙籤
夜枕花頻妒
春衫酒半淹
綠窻人散後
明鏡摘風髯

贈何彥明

芳草綠芊芊
南梁二月天
綺窻低映戶
紅袖蚤登筵
化日連乾馬
輕風卷畫船
歸來東閣下
時有麗人篇

送暹上人之笠澤

具區三萬頃
碧浸楚天深
日月循環沒
星河徹夜沉
寶坊開曉甸
幽磬隔秋林
但恐歸歟後
相思無處尋

玉壺清水室

斗室如蝸殼冲然氣象溫虛含太古雪倒覆洗頭盆色
相俱難着瑕瑜兩不存誰言鐵如意醉後怯王敦

漁樂圖

昔在山陰住門前是鑑湖晚雲昏島嶼秋水淨菰蒲漁
艇中流急衡茅倚樹孤歸來拂縑素寫作釣魚圖

次趙伯溫韻

共是越州客同為莊舄吟潮來鰻井沸龍起鏡湖陰烽

火臨邊急池塘入夢深
蘭亭修禊處無復舊攜琴

梁楷鍾馗

虎口挿虬髯藍蓼鬚
脚垂帽裙全破碎
袍袖半離披夜
雨高堂靜秋風
耗鬼悲人間多大怪
不獨錢棚兒

立仗馬

照夜玉狻猊霜毛鐵鑿蹄
春風金絡腦小雨錦障泥
御駕馳天上軍封受海西
日供三品料絨口不聞嘶

二喬圖

並倚兩嬌嬈人呼大小喬
腕鬆紅玉釧釵驪紫金翹
公瑾應同調孫郎早見招
獨憐銅雀瓦風雨夜蕭蕭

錢塘逢施孝先

亂裏交遊散信音
殊未聞海天清夜月
江樹早春雲到處
皆圖霸何人果見真相逢
惟爾在摺袴亦從軍

奎上人松風閣

兩松依邃閣
謾發春音夜靜灘聲近
秋高雨意深
石壇鳴落子
窻月動清陰
從此陶弘景
幽沉用世心

寄題佘山普照寺

塔鎖聰公影墳荒少保隣綠苔侵古檜黃葉下高椿寶
殿秋陰合雲廊月色新兩青呀不起長夜賴誰巡

次鍾君來韻

我愛山中好全無俗事牽秋霜漢口樹春水渡頭船豆
熟白鷗聚花開錦雉眠官閒僧舍近棋罷又詩篇

九日

客中逢九日心折大刀頭草白水沙靜橘紅江樹秋曉

風欺破帽落日盼歸舟空把陶潛菊長凭王粲樓

次鐵笛道人韻

翠黛鎖眉山稜愁無處安玉環雙鳳叫珠髻九龍盤花
落夢初斷鶯啼春未闌檀槽兒女語昵昵向誰彈

春登永安寺

宿雨忽開霧凭高散旅愁野烟啼翠鳥庭草臥犁牛怪
石尖於劍長杉高過樓尚懷登絕頂東北望杭州

立夏後一日寫懷

隔樹竹鷄啼夢深懷欲迷玉人方拭淚白馬政頻嘶芳
履閒花徑塵牽倚繡闈明年還舊約歸醉瑞雲西

懷越

遊子憶山陰秋風自越吟樹從秦望遠城壓鏡湖深筍
輶常攜酒梭松或載琴遙憐舊童稚久負浴沂心

玉筍集卷八

欽定四庫全書

玉筍集卷九

元 張憲 撰

七言長律

送海一漚十韻

尊者來從乾竺國畏途生出玉門關地窮西北河為帶
水盡東南島若環劫火自如潮勢吼禪心已似石頭頑
法華雨施金盃水貝葉經挑錫杖鐶幻境萬家蝴蝶夢
滄波一箇野鷗閒染輕龍女花難著德重天厨食自頒

灑氣秋橫銀色界白毫夜破鐵圍山澗溟此日浮杯去
恣嶺何年隻履還佛日未應違下國甘棠直欲遍人間
探窮大地蛟蛇窟歸立深山虎豹班

遊黃公洞十八韻

十月山城氣候偏黃公洞裏看春妍五紋鶻雀嬌疑鳳
千葉蟠桃大似蓮巨彈落星天狗碎神砮出土佛牙堅
雜花冉冉張紅錦芳草茸茸臥綠氈屋瀉蜂腰橫斷杵
岩撐虎口抱空拳澗邊野雉如人立松下馴麝傍母眠

峰隱金鷄啼曉月瀑翻銀漢下長天十圍龍竹高逾樹
五頂神芝秀結拳蘚壁冷雲封鬼谷寶函金穴秘神淵
枰遺商皓碁三角劍缺黃巢石半邊丹火有人留蛻骨
玉棺幾度葬神仙扶危鐵柱堪捫手代步花輿不下肩
世隔衲僧方廣地路迷漁父武陵船華陽未老陶弘景
勾漏先歸葛稚川記歷何嘗知晉魏流光端可繼彭錢
蓬萊方丈晷聞見流水胡麻世上傳欲報穀城山下礦
已無圯上袖中編便當導引師吾祖深避衡茅一萬年

送何山長十韻

黃岡義學何人建山長新除甚日行禮樂三千開治道
風雲九萬始修程絃歌此去培英俊俎豆由來得老成
齋舍諸生師郭泰橋門萬衆羨桓榮干戈久弛衣裳會
豪傑思趨月旦評靜考義圖紬大衍博評麟史議齊盟
壺觴日永歌魚麗琴瑟春深和鹿鳴豈但雅情違世務
終知雄略在經營玄黃未解乾坤戰薄食徒傷日月明
珍重斯文膺至寄可能坐待泰階平

寄宣參謨十四韻

輕裘緩帶晉羊公羽扇綸巾蜀臥龍霸府規模談塵裡
神州形勢坐圖中文章藻飾冰霜操戈甲森羅錦繡胃
掌上風雲開八陣指端神煞祕諸宮廟謀素抱留侯略
雅量真成謝傅容鹿角若深嚴木杵虎皮韉煖覆花驄
據鞍橫槊心何壯睹墅圍棋興政濃湖面鼓聲催落日
原頭旗影動秋風蕭蕭歸馬荒陵樹慘慘昏鴉晚寺鐘
福伍暗分玄武旆床機潛發鳳凰弓燈前五女趨符令

月下金神守劍鋒
幕客坐均三品食
健兒立侍萬夫雄
屠龍古技嗟先識
捫蝨竒論惜未逢
好在勇為天下事
扁舟歸臥五湖東

七言律

井西丹房

葛井西頭更向西
丹房高與白雲齊
鉛田虎下飛紅電
汞海龍沉結紫泥
山鬼俯欄窺火候
爐神伏地丐刀圭
飲餘一盞中黃酒
坐聽鶡聲松上啼

觀習鄉兵

吳班馮習兩都頭十里山城據上流
錦帳月明張夜宴
繡旗風煖試春蒐
裹瘡廣樂猶堪戰
垂翅回谿未足憂
天子念功思將帥
南宮聞已構高樓

題院人畫小景

高棟層軒夜未央
溶溶新綠漲池塘
風輕楊柳金絲軟
月淡梨花玉骨香
亂唾碧茸紆曲逕
獨循青瑣轉迴廊
千金一刻誰能買
輸與豪家白面郎

受上人房簪芍藥花

金縷盃安瑪瑙盤花神為我獻清歡都將東武伽藍會
直作維揚宰相看兩袖春風嬌拂坐一壺美酒醉凭闌
從教夾道吳兒笑贏得烏紗玉露溥

對牡丹有所贈

塵滿堯夫小步車東風幾度負韶華蜀人自適琴中調
吳女徒歌陌上花半裏牛酥和夢寄一腔羯鼓共誰槌
金刀剪斷雙頭錦羅帽簷嬌壓欲斜

寄周畫史

花竹翎毛滿近郊，可憐畫手日蕭條。
鳩聲未絕春常雨，鷗影不移江自潮。
魏武門風今作庶，梁家奴態動成謠。
王淵邊魯俱無信，誰寫先生五柳橋。

雪蓬

十年南雪不沾沙，獨爾孤蓬載六花。
路入溪山天一色，雲同湖海玉無瑕。
瓊田預借收冰榜，銀漢驚飛貫月槎。
我是寒江蓑笠叟，凍吟真敢繼劉叉。

席上得搖字

翠館行厨雪乍消
墻頭新柳又垂條
珊瑚枕暖人初醉
鸚鵡籠寒舌未調
座上綵鸞珠插髻
掌中飛燕玉圍腰
海棠一夜東風軟
落盡雲邊金步搖

嬉春

春來何處惱柔腸
柳下人家綠瑣窻
畫棟歌塵珠菽菽
雕盤舞袖翠雙雙
鼓翻芍藥雷轟座
酒熟醪釀雪滿缸
最憶瑤芝堂下路
一宵歸夢隔春江

贈張帥

馬似游龍槩似蛇
奔登雄雉服登猴
聲吞漢賊當陽坂
氣壓秦皇博浪沙
蔽日浮雲行按劍
滿天明月臥吹笳
同宗亦有狂書客
坐對寒窗擬禡牙

題僧知果書梁武評書帖

三十四賢三百年
能書端有幾人傳
藝高梁武評都盡
筆到隋僧法度全
逸少雄強難繼踵
元常茂密孰齊肩
摩挲斷石思存古
起倚西風一慨然

與寧子廉馬敬常飲酒得移字

我愛中州雙國士尊前為我解金龜
南山石爛歌逾緩銅柱沙沉跡未移
割土有人窺漢鼎磨崖無客頌唐碑
狂生雅抱澄清志中夜聞鷄起舞時

送海上人從軍

闔黎不肯著袈裟要斬人頭換白麻
天道近來增壁壘火星昨夜入匏瓜
山城暮雨閒弓劍沙塞秋風送鼓笳
縱不黃金銷棘籜也勝紫繡踏麻蝦

讀戰國策

鷄連六國歎從人蠶食諸侯笑暴秦
上黨禍階朝作厲長平戰血夜生燐
苟全田建松間命寧血燕丹劍下身
抖盡祖龍囊底智咸陽回首亦成塵

春日寄賽將軍

雨後教塲春草青一鞭飛馬似流星
畫旗展綵明金字花箭翻香落粉翎
虎豹韜鈴新戰陣麒麟閱舊儀
型霸吳平楚男兒事早立奇勲待我銘

東衛處士

傍山依水作幽居未減南陽諸葛廬卓行自成高士傳
浮榮不用辟書除烏絲小楮春題畫青簡長編夜著書
愧我紅塵走官馬計偕空詣漢公車

詠櫻桃

海西四月櫻桃熟曾醉吳郎珠樹叢梗落金刀紅玉潤
彩搖華月赤瑛空香唇每笑歌姬淡小字深憐妬妾同
客裏薦新家廟遠聖恩只憶大明宮

題衛生畫

拄天直壁挿山椒
拍挾晴空老氣驕
蒼隼沒雲猶可望
野烟著水未全消
樓臺落日秋蕭索
林麓西風晚寂寥
安得樂郊真似畫
日扶藜杖上溪橋

大都書所見

桃皮威策響秋空
鵝項琵琶奏晚風
西馬長腰馱赤豹
北駝穹背挂玄熊
太平有象歸文德
大獵無忘示武功
赫赫帥臣專獮狩
聖恩聞已賜彤弓

元會

天眷聖明開大業班分文武列賢寮股肱元首歌虞舜
富壽多男祝帝堯萬國山河歸正統百王禮樂聚清朝
瓊樓玉殿攢金闕紫霧紅光隔絳霄

白塔寺

紺殿瑤臺列梵區舞鸞翔鳳繞階除黃金飛出旃檀像
白馬馱來貝葉書七寶浮屠珠結繖五龍交椅玉為輿
法音一派鈞天起萬籟聲高振碧虛

登齊政樓

層樓拱立夾通衢
鼓奏鐘鳴壯帝畿
萬古晨昏常對待
兩丸日月自雙飛
壽山樹色籠佳氣
御水波光蕩落暉
手把闌干頻北望
心如征雁獨南歸

渡江懷宣元杰

北固山前春水生
瓜州渡頭人不行
火殃夜落金山寺
海氣朝吞鐵甕城
萬古不磨青嶂老
六朝都逐大江傾
伯符公瑾今何在
狼石雄談最憶卿

春日

彩毫漆點新蟬翼
奚墨雲磨舊馬肝
月落小窗瓊珮冷
夢回孤枕玉釵寒
茶蘼架雪香生宴
么鳳籠烟醉倚闌
笑我一春長閉戶
柳花填巷臥袁安

賦松江漁者

短棹輕舟白髮翁
往來常在泖西東
一篙綠水孤蓬外
九點青山落照中
不盡春光楊柳雨
無邊秋興蓼花風
鴟夷盛酒羊裘臥
表海封齊莫論功

早春

二月封門河水新
落花芳草暗平津
綵雲不作青樓夢
黃鳥空鳴綠樹春
風煖盡旗開甲第日
斜歸馬趁行輪
紛紛冠蓋埃塵裡
誰問城東樹屋人

悼惠師

八十一年塵夢醒
佛臺歸坐九蓮青
金銀氣斂心無碍
衣鉢囊空性始靈
舍利自飛阿育塔
茶毘不損貝多經
春風花草新阡下
日有門徒打墓銘

贈軒轅道士

子是彌明幾代孫姓名乃使世間聞坐驚星斗生雷劍
動使烟霞繞練裙月裡白鸞招子晉山前青虎借茅君
長春酒熟朝朝醉高枕瑤琴卧碧雲

王氏小桃源

一簇林塘隱者棲天然畫出武陵溪循牆流水灣灣曲
匝屋桃花樹樹低春雨閉門山犬吠炊烟隔竹午鷄啼
幽深直得秦人避但恐漁郎自路迷

題宋仲溫墨蹟

江南羽化張天雨海上神交宋仲溫楷法鍾繇稱獨步
草臨皇象已專門折釵未墜風前髮屋漏先垂雨後痕
寄謝墨池諸俊彥蚓蛇鷄鶩莫須論

留別賽景初

暖雲將雨聚陰晴四月羅衣尚未成萬點愁心飛絮影
五更殘夢賣花聲方空越白承恩厚繡襖諸干照道明
自笑窮途不歸去空懷漫刺闔閭城

蘭棘圖

山果羅生何瑣細
幽蘭叢雜愈馨香
寒根壓石垂垂瘦
惡棘侵蹊故故長
甘苦所需同雨露
萌芽餘幾更牛羊
撫圖未用增嗝唏
且復呼兒進一觴

送賽將軍入吳興收集故業

暫歇將軍帳下驄
樓船西入水晶宮
集賢書畫干戈外
公子田園簿籍中
天目諸山皆走北
太湖萬頃獨朝東
不堪重舉新亭歎
地下前王淚血紅

謝惠墨

南唐五季久絕蹟老潘入井法不傳太史瀉文今有價
故家豹素定誰捐篆成屈玉雙釵並詩寫聯珠九曲穿
直待枋頭修史了却須佳傳贈陳玄

臨安軍前

寂歷荒城遍野蒿昔人事業已徒勞雁將秋色催歸馬
楓引霜花入戰袍地阻東南鄉信遠天昏西北陣雲高
不堪屢作還家夢起倚西風舞大刀

畫馬

臆前鱗甲隱龍紋前立啼鷄後犬蹲天仗威儀猶想見
江都法度尚生存廐官自寵王毛仲部校誰竒賀六渾
幾度夜深瞻象緯可憐房宿至今昏

王師討徐

相臣虎拜別龍顏廟筭神機指日還大選五兵開武庫
長驅萬馬下天閑投鞭足竭長河水磨刃能平九里山
為報寵勛先授首黃樓土色夜來殷

次葉秀才韻

丈夫有淚濯氛埃莫作尋常兒
女哀帝室河山初不改
令公幙府幾時開仰瞻北斗低
金闕遙望中天近玉臺
安得吳兒八千騎為君縛取衛
王來

黃大癡畫

樹裡人家似輞川
塢中草木類平泉
下方官府自徵稅
何處漁郎來繫船
百折澄溪東走海
萬尋直壁上摩天
筆端點點皆清氣
誰道癡翁不解仙

書憤

離宮金翠化為烟土宇雕零舊幅員豈是相君酣醉日
況逢天子中興年武關兵馬全無信浯水文章久未鐫
白髮詩翁憂帝室長歌泣血拜啼鵑

良宵

良宵情緒不堪題立遍闌干意欲迷鐵撥忽敲壺口破
金刀頓剪燭心齊綠分楊柳相簾細紅壓櫻桃斗帳低
彷彿第三橋畔宿月明珠樹夜烏啼

次韻江鍊師

道人容貌似嬰孩，手扶天罡步斗魁。
拄杖神遊却月觀，渡風夜上鍊丹臺。
劍橫秋水蒼龍化，衣染春雲玉女裁。
聞道蓬萊隔東海，芙蓉三朶翠成堆。

次韻孫頃

十年戎馬動成群，勢比連鷄未解紛。
天狗星流聲震地，蚩尤旗卷氣垂雲。
仆碑誰讀平淮頌，詎鬼人傳詛楚文。
安得爾家賢討虜，雄談狠石坐宵分。

花洞

花洞花開雲錦鋪
看花遊女白如荼
素羅便面歌紅拂
紫障梁塵舞綠珠
楊柳露乾方作態
海棠春困未全疎
畫船來往仙潭潤
人在銷金十里湖

李遵道枯木

葉蠹心枯勢欲僵
火焚雷剪類空桑
強扶朽質排元氣
力挽旁枝障太陽
鬼狀虺隤生意少
龍鱗剝落本根傷
薊邱深意吾知得
珍重君王別棟梁

玉筍集卷九

欽定四庫全書

玉筭集卷十

元 張憲 撰

絕句 五言

次韻虞閣老題柯丹邱畫

夜雨幽篁密，晨霜落未多月。明商女恨江冷，越人歌

天馬二首

蕃方皆貢馬，聖意本求書。縱使行千里，終當駕鼓車。
今代佛郎國，龍媒進上都。後斯能作頌，周朗善為圖。

董羽臥沙龍

仰閣青牛首橫搯赤鯉腮輕雷驚不起直待早潮來

宮廊雪霽圖

樹影上堦除宮廊雪霽初門前有鹹草倚柱待羊車

宮怨

寶索懸珠玲霜花上玉墀井桐紅似錦不寫御溝詩

畫扇

萬木落秋風雙柵氣勢雄嶙峋一拳石留取補天空

陸垣畫

山果綴丹實霜林開畫屏美人湘水上誰與拾秋馨

醉歸

五柳低垂地孤松俯壓檐門生舁竹轎往取醉陶潛

士女圖

孔雀當階舞芙蓉夾路生玉人誰作伴相對坐調笙

葡萄

天上金盤露人間玉樹秋長卿消渴久明日再扶頭

竹石

春來不肯晴綠苔遍頑石曉起看新梢一夜高一尺

柯丹邱枯木竹石圖

粲粲翡翠斂歷歷珊瑚樹露涼蘿月高相魂不知處

梁楷鬼

既竊寧王笛又盜妃子扇雖曰情狀深終為端士見

桂花便面

冷露下山阿寒光濕秋宇天香鏡中來照見姮娥語

畫竹

涼風徐徐來六月靜如水但恐瀟湘姿不堪美人倚

秋棠

秋棠類春櫻粲粲耀緋綠可憐竹與蘭零落在空谷

畫扇

渴龍飲清江江水皆倒立風雨滿山來石楠半身濕

溫日觀葡萄

銀甕懸紫駝驛騎曉來急西風吹竹窻一夜鮫人泣

盛子昭畫

秋樹半着霜水落石嶮嶮寄謝清渭翁釣得營邱否

八仙花

手折八仙花贈予十日別春光不待人歸來已成雪

絕句六言

採桑圖

道旁人畫秋胡桑間誰是羅敷莫戀懷中金餅倚門家
有嚴姑

瘦馬圖

神駿豈在澤毛力強不妨少肉仗前無限豐駒徒糜君
王芻粟

湖上二首

綠蓋遮籠菡萏碧瀾搖蕩鴛鴦菴畫船中鼓板銷金鍋
裡時光

紅杏墻頭粉蝶綠楊窻外黃鸝何處春光最好踏青人
在蘇堤

夜月

夜月小樓感策東風深院琵琶料理宿醒未了春光又
在隣家

冠蓋

冠蓋花間玉驄綺羅簾下香風一體傷春病酒奈何轉
眼西東

問鵲

寒食清明已過牡丹芍藥將開為問檐前喜鵲遠人何

日歸來

楊妃睡起圖

琥珀梳空荔子龍香撥冷琵琶問道三郎何在今朝早
仗南衙

自歎

臺閣荒涼鼎鐘家山辜負雲松徧地烟塵豺虎何年雷
雨蛟龍

宮體

欽定四庫全書

玉筍集
卷下

五

綺疏面面玲瓏衝牙步步丁東金尾屏風孔雀銀牌絲
線梧桐

早春湖上

玉驄草軟平田油幕風輕畫船燕子釵頭春勝梨花院
裡鞦韆

軍士

黃犢草肥易牧雕弓雪冷難彎比似馬鞍作枕何如牛
背看山

陶淵明

二頃半田種秫八十餘日居官稍帶收成解印也教妻
子心寬

題畫

遠岫層層何處矮房簇簇誰家烟樹夕陽歸鳥清溪古
渡橫槎

寄王祖孝

許昌城中種菜弘農道上騎牛笑我雨宵剪燭憐君月

夜凭樓

漁翁圖

細雨斜風箬笠淡烟殘月蓬窻意足半篙春水夢回一
枕秋江

絕句 七言

秋夜書所見

大星殞地聲動屋明月入樓光滿床起看北斗正半夜
白氣繞城如女牆

長蘆鎮書所見

旋風捲簾楹柱天長河斷流水膠船擬隨富翁同守凍
只有一句沽酒錢

聽松圖

洪厓羽士篋衣輕脚踏青鸞下玉京直壁倒懸秋萬尺
盤陀石上聽松聲

早春寄雅宜山人

天平東下瞰靈岩一派雲巒黑萬杉鶯燕未來花柳瘦

欲於何處試春衫

贈菊田道人

秋雨開田四十雙陶家舊徑遂成荒
中年眼角方如口
始信菊花滋味長

酈生長揖圖二首

淮南黥王乃可傲高陽酒徒何必輕駕馭
英雄斯有術
不宜如此見書生

踞床洗足非為慢長揖軍門也不多大抵英雄皆坦率

子陽罄折竟如何

許將軍郊居

東青門東草地平
曉來濃霜如雪明
細弓膠勁不須焙
手撚髀頭尋雁聲

東竇彥南

二十四橋風月清
瓊花觀裡坐吹笙
金盤露冷凝脂滑
一夜新霜睡不成

赤壁圖

金
卷十
白露橫江山月小柔櫓啞啞烟渺渺船尾一聲吹洞簫
回首黃州天已曉

竹蝶圖

落盡春紅春夢熟平沙小苑窻中綠美人睡起背東風
蛺蝶飛來上修竹

子陵獨釣圖

天上故人赤伏符羊裘大澤隱狂奴絕憐一線桐江月
不換當年諫大夫

余山道中

老樹排雲石逕斜
炊烟起處有人家
一聲啼鳥春成夏
新綠滿汀浮柳花

脊鴿圖

曉來霜重蒹葭濕
枯楊颯颯西風急
隣家兄弟政鬪爭
不見脊鴿原上立

吳仲圭畫荔枝障

知味何人似蔡襄
方紅陳紫與誰嘗
七閩塵障南來使

腸斷薰風十八娘

弔寶維賢參政

紫團犀鈔新公服
鐵馬金戈舊戰場
倘使僵尸已馬革
也勝廟食水仙王

鐵笛道人遺感策七絕

朔客有以感策遺道人者
道人以送予且將以詩仍率五溪馮濟錦泉馮文和以成什子
深愧無李邕年之藝而虛得張承吉之名也
既次第來誦復賦此答美意且邀李桐屋僧
守仁
同賦

贊皇太尉有新題不減吳江與會稽最憶秋山霜月夜
卷蘆一曲醉如泥

朔客蒼頭一尺髭酒酣氣熱卷蘆吹花娘不展徘徊拜
虛負王孫五字詩

長安城裏紫葡萄關塞遺聲透月高一十八星清竅冷
無人喚起薛陽陶

南徐江上月黃昏誰嚼寒爐對酒樽滿耳胡風全不競
空煩公主嫁烏孫

漢家鹵簿最多儀來駕雙狐武騎隨不似酒邊呼李袞
靜攜九漏月中吹

一曲邊聲繞月樓滿天兵氣似并州塞鴻不管關山怨
閑却吹螺小比邱

國手傳聞張野狐清歌最善月中蘆風前靜洗瑩篴耳
別畫明皇按舞圖

冬至古城簡楊馮二先生二首

徧地妖氛起砲車十年戎馬未寧居瑞雲一朵壺中境

留作先生魯觀書

昨夜三更雨似酥
新陽地底動葭莩
憑誰早起書雲物
梓慎曾為魯大夫

留別盛經歷

重關複道固高深
戰勝尤宜苦用心
莫倚慣曾擒李密
賊徒今不走桃林

方頤

方頤大口玉顏紅
七尺長身猛似熊
偏得將軍傳武藝

濶街飛馬背開弓

題畫

晴川渺渺停春水
怪石峩峩插亂山
最愛夕陽烟寺裡
千株古木一僧閒

釣魚圖

水痕新落露灘沙
葉葉丹楓映晚霞
六尺釣竿三尺線
先生意不在魚蝦

趙集賢枯木竹石

槎牙老樹響天風
寂歷幽篁泣露叢
惆悵玉堂舊公子
故家陵廟月明中

戲歌兒

閒門落籍丁文
梳教子讀書隨意
歌湖上水雲樓上
月如今贏得夢魂多

達實巴圖爾平章復許州

狡計爭功笑子都
登城不在奪盃弧
少留天使須臾飯
坐看將軍入許鄆

贈日者

玉節旌旗照帥符，虎爭龍鬪正吞屠。
煩君勇啓談天口，說破當今推祕圖。

贈僧星無像

蚩尤天狗正狰獍，五緯紛紜起鬪爭。
一點圓靈無認處，六符誰問泰階平。


西窻三首

西窻大樹遮夕陽，南樓小溪生晚涼。
青天無雲鳥飛絕。

白蘋起風蟬噪長

寒瓜激齒冰雪香白石枕頭魂夢長
枇杷葉大暑光薄
梧桐生子秋意涼

赤日欲落又未落清風忽來或不來
溪邊屬玉成對立
水上藕花相間開



玉筍集卷十